


Совѣръ святыхъ Кольскаго Сѣвера



ЯВЛЯЕТЪ И СЛУЖИТЪ
СОВОРУ КОЛЬСКИХЪ СВЯТЫХЪ





**СОБОР
КОЯСКИХ СЯТЫХ**

ДЕНЬ СОБОРНОЙ ПАМЯТИ

16 / 29 декабря

ТРОПАРЬ

Собору Кольских святых, глас 1:

Свѣтлый сонме подвижников земли Кольския, / Севера тьму сиянием веры озаривших, / отцы святии, благочестием украшеннии, / служителие Таин Божиих благоговейнии, / боголюбивии иноцы и учителяе покаяния, / миряне, чистым житием Создателю угодившии, / языка лопскаго богомудрии просветителие и наставницы, / новомученицы и исповедницы, за Христа души положившии, / в горьких работах даже до смерти Его исповедавшии, / молитесь ко Господу // спаситися душам нашим.

КОНДАК

Собору Кольских святых, глас 3:

Днесь лик святых, в земле Кольстей Богу угодивших, / предстоит в церкви и невидимо за ны молится Богу, / придите, христоименитии людии, / память их почтим и возопиим к ним: / радуйтесь, отцы преблаженнии Трифоне, Феодорите и Варлааме, / со многими нашего края небесными покровители, / вы бо, яко звезды святозарныя, во мраце Севера возсияли есте, / словесы и чудесы своими вся просветивше, / и ныне молитесь Господеви / веру Православную zde незыблему соблюсти // и даровати нам велию милость.

СЛОВО

о Соборе Кольских святых

27 декабря 1995 года сбылась мечта отцов-просветителей Великой Лапландии XVI века, преподобных Феодорита Кольского и Трифона Печенгского. На территории Кольского края впервые была учреждена самостоятельная епархия – Мурманская. 28 ноября 2003 года по благословению Его Святейшества Святейшего Патриарха Алексия II был установлен День Соборной памяти Кольских святых – 16/29 декабря.

В связи с совпадением дня памяти преподобного Трифона Печенгского с днем Собора Кольских святых в ноябре 2022 года по благословению Его Святейшества Святейшего Патриарха Кирилла День Соборной памяти Кольских святых был изменен на 16/29 декабря.

СОБОР КОЛЬСКИХ СВЯТЫХ

- Преподобный Трифон Печенгский (1485–1583 гг.).
- Преподобный Феодорит Кольский (1481–1571 гг.).
- Преподобный Варлаам Керетский (ок. 1502–1599 гг.).
- Преподобный Евфимий Корельский (сер. XIV в. – 1435 г.).
- Преподобномученик Иона Печенгский (ок. 1503–1589 гг.).
- Преподобномученик Герман Печенгский († 1589 г.).
- Преподобномученик Гурий Печенгский и с ним 116 преподобномучеников Печенгских († 1589 г.).
- Преподобные Астерий (Аксий), Авксентий и Тарасий Кашкаранские (XVII век).

НОВОМУЧЕНИКИ ЦЕРКВИ РУССКОЙ

- Преподобномученик Моисей (Кожин) (1868–1931 гг.).
- Преподобномученик Феодор (Абросимов) (1897–1941 гг.).

ОСОБО ЧТИМЫЙ СВЯТОЙ МУРМАНСКОЙ МИТРОПОЛИИ

- Святой благоверный великий князь Александр Невский, покоритель Биармии, не входит в Собор Кольских святых, но сугубо почитается в Мурманской митрополии как российский правитель, присоединивший в 1251 году земли Кольского Севера к Новгородской Руси в результате Полярного похода.

МЕСТНОЧТИМЫЕ УСОПШИЕ МУРМАНСКОЙ МИТРОПОЛИИ

- Преподобный Илия (Тучков) (XVI век), священноинок, агиограф и гимнограф, соратник прп. Феодорита Кольского в деле просвещения Крайнего Севера.
- Преподобный Безымянный Инок Терский, Кашкаранский (XVII век).
- Преподобномученик Паисий (Рябов) (1881–28.12.1940 гг.), игумен Печенгского монастыря.

- Преподобный Иоанн (Алексеев), Валаамский (1873–5.06.1958 гг.), игумен Печенгского монастыря, В 2019 году прославлен Финской Православной Церковью в лике преподобного.
- Святой праведный Георгий Терентьев (1823–12.09.1904 гг.), протоиерей. Настоятель многих церквей лопарских погостов. Просветитель лопарей.
- Святой праведный Константин Щеколдин (1846–5.10.1916 гг.), протоиерей, настоятель Борисоглебского храма, что на р. Паз. Просветитель лопарей, радетель о саамской письменности.

МЕСЯЦА ДЕКАБРЯ В 16-Й ДЕНЬ (29 ДЕКАБРЯ ПО Н. СТ.)

Всех святых, в земли Кольстей просиявших

НА МАЛОЙ ВЕЧЕРНИ

На Господи, воззвах: стихиры на 4, глас 1:

Днесь радуйся, душе, и ликуйте, собори празднлюбезнии, / яко до Севера Крайняго и моря Ледоватаго приидоша чада Господня. / Днесь во тьме полунощней идольстей возсия благодать веры, / мгла разгнася, свет облистя, / туман разсеяся и взыде Солнце Правды. / Днесь Церковь земли Кольския приносит Богу плоды: / се аз и дети, яже ми даде Бог, // молитвами отцев Кольских, Христэ Боже наш, помилуй нас.

Приидите, людие, воспойм собор ангелоподобных, / восприявших веры щит, / отринувших страстей тьму, / окрепших в невидимых бранех, / скитающихся в пустынях лопарских / и в горах, и в пропастях земных, / обративших в бегство полки бесовския, / даже до крове пострадавших / и муки многообразныя от безбожных претерпевших, / вменивших поношение Христово паче сокровищ мирских, / с любовью припадём к ним, // тех молитвами, Христэ Боже, помилуй и спаси души наша.

Взыде к Богу молитва Ангела великия Лапландии, / и в пределах мрачныя Похьелы явися воинство Христово, / провозвестницы благодати, учителяе покаяния, / глашатаи жизни вечныя, /

вси сий послушествовани быша верою евангельскою, / и стрясе земля Кольская тьму мракобесия, / и водрузися на ней Крест Господень: // Церкви красота и демонов язва.

Слава, глас 6:

Кто не удивится любви вашей к Богу, / о, троице равноапостольная, / Феодорите блаженне, Трифоне преподобне, Варлааме всехвальне / со ученики вашими верными! / Вменили бо есте звезду Полярную во звезду Вифлеемскую / и радостно направили есте стопы своя / при бреже Ледоватаго моря в край северныя страны. / Темже народу лопскому добрии пастырие и любящии отцы явились есте, / пустыню непроходную благою вестью огласивше, / вьюгу сердечную людей сих усмирили есте, / да воспоет народ новопросвещенный: // слава в вышних Богу и на земли мир!

И ныне, Богородичен, глас тойже:

Праведно есть хвалити Тя, мира Владычицу, / яко и месту сему дольному / даровала еси Небес велелепие: / zde бо и храмы Ти создашася краснии, / и иконы Твоя чудес исполняхуся. / Мы же, веселящися, прославляем Тя, Мати щедрот, // подающую мир земли сей и велию милость.

На стиховне стихиры, глас 1.

Подобен: Небесных чинов:

Киими похвалами восхвалим преподобных отцев Собор? / Киими славословии прославим светоносную память их? / Память святых земли нашея явися великое торжество. / Ныне прославльшему вас Христу предстояще, / молитесь о нас прилежно, // любовью совершающих летное ваше празднество.

Стих: Восхвалятся преподобнии во славе / и возрадуются на ложах своих.

Приидите, монашествующих множество днесь, / Трифона, благочестия подражателя, песнями и пеньми восхвалим, глаголюще: / радуйся, преславне Трифоне, земли полнощней пресветлый светильниче; / радуйся, яко Троице предстоиши со Ангелы, / Юже непрестанно моли спасти всех отцелюбцев, // достойно тя почитающих.

Стих: Священницы Твои облечутся в правду, / и преподобнии Твои возрадуются.

От младенства добродетели прилежа́в, / сосуд Духа Святаго, преподобне Феодорите, явился еси́, / чистоту́ и целомудрие соблю́л еси́, / прост и кроток, смирен сердцем, верен Богу, / истинною премудростию просвещен, отче преблаженне, был еси́, / сердце свое́ Христу́ вверивый, / почестей земных не иска́вый, / всем помышлением к Богу простира́выйся, // отче Феодорите, моли́ Христа́ Бога о нас.

Слава, глас 2:

Приидите, любящии преславныя подвиги святых, / восхвалим преподобнаго Варлаама из Керети, / той бо благобытие мира сего́ превредил есть / и, живот свой ни во что́же вменив, крест тяжкий взем, / Христу́ смирением и доблестию последовал е́сть. / Мы же прославляем Бога, дивнаго во святых Своих, // подающего нам образ безприкладный и велие надеяние.

И ныне, глас тойже:

Спаси́ от бед рабы Твоя, Богородице, / яко вси по Бозе к Тебе прибега́ем, // яко нерушимей стене́ и предста́тельству.

Тропарі писаны на велицей вечерни. Ектенія ма́лая и отпу́ст

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихиры на 8, глас 8.

Подобен: О, преславного чудесе́:

О, преславнаго чудесе́, / дивнии уго́дницы Божии, / яко древа́ ма́сличная в непло́дней пустыни земли́ Ко́льския прозя́бшии, / нами́ славосло́вятся днесь. / О, преподобнии мужие, / мученицы и страсотерпцы земель се́верных, / от родов́ наших прозя́бшии, / се́яния небеснаго клáсы духовнии, / плод сторицею Господу сотворившии, // моли́тесь за ны, при́сно ублажа́емии.

О, преславнаго чудесе́, / Ко́льския земли́ святых Собор / немолчными пёсньми и непрестанными славословии восхваляет-

ся днесъ, / и в моли́твах призыва́ются пусты́нницы и молча́льницы, / просвети́телие и испове́дницы, / благоче́стия и правосла́вия и́стиннаго ревни́телие, / тайнницы Боже́ственнии. / О, чу́днии уго́дницы Христо́вы всехва́льнии, / Го́сподеви моли́тесь // дарова́ти душа́м на́шим мир и ве́лию ми́лость.

О, пресла́внаго чудесе́, / зве́зды мы́сленныя в десни́це Бо́жией, / над земле́ю Ко́льскою возсия́вшия, / истины Христо́вы свети́льницы, / благода́тию ве́ры возжже́ннии, / све́том добродете́лей ва́ших озаря́ете вся, / и в моли́твах по́мощь подава́ете, / и на путь спасе́ния наставля́ете // светоно́сную ва́шу па́мь праж́днующих.

О, пресла́внаго чудесе́, / исто́чницы вод, из са́да Еде́мскаго теку́щи / и благода́тно страну́ полно́щную небе́сною вла́гою ороша́ющи, / кладези чуде́с пока́жете нам, / при́сно моле́бно почита́ющим вас, / Ко́льстии вели́ции уго́дницы Бо́жией, / не преста́ните и на бу́дущее вре́мя // ми́лости и чуде́са́ изливати до ве́ка.

О, пресла́внаго чудесе́, / жи́телие Гра́да Небе́снаго, / по́двигом до́брым подвиза́вшиися, / тече́ние сконча́вшии, ве́ру соблю́дшии, / на́ми воспева́етесь днесъ, / А́нгельскому ли́ку сопричто́стесь, / моли́твенницы земли́ Ко́льския яви́стесь: / се́го ра́ди, ны́нешнее прие́мше на́ше приноше́ние, // от вся́кия напа́сти изба́вите нас.

Ины стихи́ры, глас то́йже:

В черто́зех го́рних, сия́ющих ны́не, / с небе́сными ли́ки водворили́ся есте́, уго́дницы Ко́льстии, / ликовству́ете с му́дрыми де́вами совше́дшими, / и́бо прия́л есть Влады́ка Госпо́дь / смире́нныя рабы́ Своя́ во сла́ве / от вре́менных к ве́чной ра́дости, // Еди́н Благ и Человеколю́бец.

Свяще́ннейший Собор че́стных преподо́бных и богоно́сных отце́в Ко́льских велича́ем / и мно́жество преподо́бномуче́ников, / ли́ки пострада́вших новомуче́ников кре́пко почита́ем, моля́щесь, / уго́дников Твои́х собо́ри многообра́зными добродете́лями освети́шася, / зако́ну Твоему́ повиную́щесь, / и насле́дницы бы́ша оби́телей Твои́х Небе́сных, / Влады́ко Царю́: ихже моли́твами // и нас та́можде всели́ши, Преми́лостиве.

Яко многосве́тлыя зве́зды добродете́лей све́тлостию озаря́ете ве́рных исполне́ния, / преподо́бнии отцы́ на́ши и вси Бо́жией уго́дницы земли́ Ко́льския. / Совоку́плься Собо́р святы́х Твои́х, Го́споди, ра́ди любве́ / и, тоя́ наслажда́ющесь, со А́нгелы лику́ет

о Тебѣ, Всевѣдче Господи всех: / егѡже ликовствованія да и нас сподобиши // молитвами угодников Твоих, Всесильне.

Слава, глас 2:

К иими славословіи прославим светонóсную пáмять Кóльскихъ святыхъ? / Человѣцы бо небеснии и Ангели земнии явились суть, / в земли полнощней добродѣтелями просиявше. / Воспоёмъ вкупѣ с дрѣвними отцы лики новомучеников и исповѣдниковъ Россійскихъ, / до крове Христа исповѣдавшихъ во спасеніе, / заточенія, изгнанія, горькія работы и смерть ради Бóга сладце претерпѣвшихъ, / и возопиимъ к нимъ: тёпле молитесь ко Господу / край нашъ сѣверный в Православіи утвердити / и спасти души наша, с вѣрою и упованіемъ в молитвахъ к вамъ прибегающихъ // и творящихъ святоѣ ваше празднество.

И нынѣ, Богородичен, глас тойже:

П рѣйде сень законная, / благодати пришедши: / якоже бо купина не сгораше опаляема, / тако Дѣва родила еси и Дѣва пребыла еси; / вмѣсто столпа огненнаго / праведное возсия Солнце; / вмѣсто Моисея – Христосъ, // спасеніе душъ нашихъ.

Вход. Прокимен дне и чтенія три. Притчей чтеніе:

П амять праведнаго с похвалами, и благословеніе Господне на главѣ егѡ. / Блаженъ человекъ, иже обрѣте премудрость, и смѣртенъ, иже увѣде разумъ. / Лучше бо сию куповати, нежели злата и сребра сокровища. / Честнейшая же есть каменій многоценныхъ, все же честное недостоинно ея есть. / Долготá бо дний и лѣта живота в деснице ея, в шуйце же ея богатство и слава. / От уст ея исходитъ правда, законъ же и милость на языкѣ носитъ. / Послушайте убо мене, о чада, честная бо реку, и блаженъ человекъ, иже пути моя сохранитъ: исходи бо мой – исходи живота, и уготовляется хотѣніе отъ Господа. / Сего ради молю васъ и предлагаю мой гласъ сыновомъ человеческимъ. / Яко азъ, премудрость, устрой советъ, и разумъ и смыслъ азъ призвахъ. / Мой советъ и утвержденіе, мой разумъ, моя же крепость. / Азъ мене любящія люблю, ищущи же мене обрящутъ благодать. / Разумѣйте убо, незлобивии, коварство, ненаказаніи же, прилагайте сердца. / Послушайте мене и паки, честная бо реку, и отверзу отъ устенъ правая, яко истинѣ поучитъся

горта́нь мой, ме́рзки же пре́до мно́ю устны́ лжи́выя. / С пра́вдою
вси глаго́лы уст мо́их, ничто́же в них стрóпотно, ниже́ развра-
ще́нно. / Вся пра́ва суть разумева́ющим и прóста обрета́ющим
ра́зум. / Науча́ю бо вас и́стине, да бу́дет о Го́споде наде́жда ва́ша,
и испо́лнитеся Ду́ха.

Притчей чтение:

Уста пра́веднаго ка́плют премудро́сть, язы́к же непра́веднаго
поги́бнет. / Устне́ муже́й пра́ведных ка́плют благода́ти, уста́
же нечестивых развраща́ются. / Ме́рила льсти́вая ме́рзость пред
Го́сподем, вес же пра́ведный приятен Е́му. / Иде́же а́ще внидет до-
сажде́ние, та́мо и безче́стие, уста́ же смире́нных поуча́ются пре-
мудро́сти. / Соверше́ние пра́вых наста́вит их, и поползнове́ние
отрица́ющих упасе́т их. / Не по́льзуют и́мения в день я́рости,
пра́вда же изба́вит от сме́рти. / Умер пра́ведный, оста́ви раская́-
ние, нару́чна же быва́ет и посмея́тельна нечестивых па́губа. /
Пра́вда непоро́чнаго исправля́ет пу́ти, в нече́стие же па́дает не-
пра́вда. / Пра́вда муже́й пра́вых изба́вит их: безсове́тием же пле-
ня́ются беззако́ннии. / Сконча́вшуся му́жу пра́ведну, не погибнет
наде́жда, похва́ла же нечестивых погибнет. / Пра́ведник от лова
убе́гнет, вме́сто же его́ преда́ется нечестивый. / Во усте́х нечести-
вых сеть гра́жданом, чу́ство же пра́ведных благопоспешное. /
Во благи́х пра́ведных исправится град, и в погибели нечестивых
ра́дование. / Во благослове́нии пра́вых возвы́сится град, усты́ же
нечестивых раскопа́ется. / Руга́ется гра́жданом лише́нный ра́зу-
ма, муж же му́дрый безмо́лвие во́дит.

Премудрости Соломоновы чтение:

Пра́ведных ду́ши в руце́ Бо́жией, и не прикосне́тся их му́ка. /
Непщевани бы́ша во очесе́х безу́мных умре́ти, и вмени́ся оз-
лобле́ние исхо́д их, и е́же от нас ше́ствие – сокруше́ние, они́ же
суть в ми́ре. / И́бо пред лицём челове́ческим а́ще и му́ку прииму́т,
упова́ние их безсме́ртия испо́лнено. / И вма́ле наказа́ни бы́вшие,
вели́кими благоде́тельствова́ни бу́дут, я́ко Бог искуси́ я и обре́те
их досто́йны Себе́. / Я́ко зла́то в горни́ле, искуси́ их и, я́ко всепло́-
дие же́ртвенное, прият я. / И во вре́мя посеще́ния их возсия́ют и,
я́ко и́скры по сте́блию, потеку́т. / Су́дят язы́ком и облада́ют людь-
ми, и воцари́тся Го́сподь в них во ве́ки. / Наде́ющиися Нань разу-
ме́ют и́стину, и ве́рнии в любви́ пребу́дут Е́му. / Я́ко благода́ть и
ми́лость в преподо́бных Его́, и посеще́ние во избра́нных Его́.

На литий стихира храма и стихиры святых, глас 1:

На небесех просвещаемы зарями трисолнечнаго сияния, / святый угодницы Кольстии, / Бога нам ныне благопрёмённа сотворите молитвами вашими, // чистым сердцем вас призывающим.

Слава, глас 6:

Днесь ликует Великая Лапландия, / исполнь небо и земля полнощная благодатию Святаго Духа / ныне в празднование памяти Собора богоносных отец Кольских. / Темже вси, сошедшися, тако рцем: / радуйтесь, благодатнии сосуди Духа Божественнаго, / преподобнии отцы наши Трифоне, Феодорите, Варлааме, / Евфимие, Аксие, Авксентие и Тарасие, / преподобномученицы Печенжстии Ионо, Германе и Гурие / и иже с ними сто шестьнадесять мученик Печенжских, / такожде новомученицы Церкви Русския Моисее и Феодоре со иными многими, / вас бо Христос, яко всеплодие жертвенное, прият, / на небеса возведё, идеже со Ангелы ликуете ныне, / поминайте любовь ублажающих вас на земли // и творящих святое ваше празднество.

И ныне, Богородичен, глас тойже:

Богородице, Ты еси лоза истинная, / возрастившая нам Плод живота, / Тебе молимся: молися, Владычице, / со всеми святыми земли Кольския // помиловати души наша.

На стиховне стихиры, глас 5:

Радуйтесь, достославнии отцы, старцы пустыннолюбивии, / постами и молитвами / блага, пропасты и каменья Кольския облагоухавшии; / радуйтесь, немолчными славословии благодатно пустыни лопарския возделавшии; / радуйтесь, Духа Святаго честныя обители; / радуйтесь, славо церковная и исправление добродетелей; / радуйтесь, ныне Христу Владыце предстоящи; / молитесь о нас прилежно, // любовь совершающих светлое ваше торжество.

Стих: Восхвалятся преподобнии во славе / и возрадуются на ложах своих.

Радуйтесь, преподобнии отцы Кольстии, / подвига молитвеннаго ревнителие / и благоговейнаго безмолвия сослужителие; / радуйтесь, совершеннаго терпения зерцала / и сосуди постного воздержания; / радуйтесь, единомысленнии Божии священнотайницы / и иноческаго жития украшение /; радуйтесь, края пол-

но́щнаго похвало́ и сла́во; / те́мже, соше́дшеся благоче́стно, //
светоза́рную ва́шу па́мь чё́стно пра́зднуем.

Стих: Свяще́нницы Твои́ облеку́тся в пра́вду, // и преподо́бнии
Твои́ возра́дуются.

Ра́дуйтеся, блаже́ннии отцы́ святы́и, / в лишэ́ниях на земли́
пожи́вши; / ра́дуйтеся, глад и мра́з претерпе́вши; / ра́дуйте-
ся, ско́рби и поноше́ния терпели́во понёсши; / ра́дуйтеся, я́ко
зла́то есте́, искуше́нное от земли́, / очище́нное седмери́цею; /
ра́дуйтеся, Влады́це предстоя́щи / и в небе́сных оби́телех ны́не
веселя́щиися; / ра́дуйтеся, засту́пницы бо есте́ и предста́телие
на́ши ве́рнии, // при́сно восхваля́ем вас любо́вию.

Сла́ва, глас 6:

Прииди́те, ве́рнии, / духо́вно возвесели́мся днесь, / я́ко в на-
ро́читом дни пра́здника, / и, ликовству́юще, возопи́м: /
преукраша́йся, Фиваи́до се́верная, / красуй́тесь, пу́стыни и де́-
бри лапландския, / возрасти́вши свято́е и сла́вное отце́в все-
вои́нство, / достохва́льным жити́ем нас наставля́ющее / во след
Христу́ невозврати́ шествовати. / Сего́ ра́ди в пе́снях духо́вных
и пений // па́мь ва́шу све́тло пра́зднуем.

И ны́не, Богоро́дичен, глас то́йже:

О, Де́во, Ма́ти Благая́, Всепе́тая, / ми́рови Покро́ве и Засту́п-
нице, / не оста́ви оби́тели и хра́мы земли́ Ко́льския Свои́м
заступле́нием, / я́коже и во успе́нии ми́ра не оста́вила еси́, // но
спаса́й вся, на Тя упова́ющия.

*На благослове́нии хлебо́в: тропа́рь святаго, два́жды,
и Богоро́дице Де́во: еди́ножды.*

Тропа́рь, глас 4:

Све́тлый со́нме подви́жников земли́ Ко́льския, / Се́вера тьму
сия́нием ве́ры озари́вших, / отцы́ святы́и, благоче́стием пре-
украше́ннии, / служи́телие Та́ин Бо́жих благоговей́нии, / бого-
любовии ино́цы и учи́телие пока́яния, / миря́не, чи́стым жити́ем
Сзда́телю угоди́вши, / языка́ ло́пскаго богому́дрии просвети́-
телие и наста́вницы, / новому́ченицы и испове́дницы, за Христа́
ду́ши положи́вши, / в го́рьких рабо́тах да́же до сме́рти Его́ ис-
пове́давши, / моли́тесь ко Го́споду // спасти́ся душа́м на́шим.

НА УТРЕНИ

На Бог Господь: тропарь Собора святых (дважды).
Слава, и ныне, Богородичен, глас 4:

Еже от века угаенное / и Ангелом несведомое таинство, / Тобою, Богородице, сущим на земли явися Бог, / в неслитном соединении воплощаемь / и Крест волею нас ради восприим, / Имже воскресив первозданного, // спасе от смерти души наша.

По 1-й стихологии седален, глас 2:

Яко странницы и пришельцы есте на краю земли, отмечающиеся плотских похотей, яже воюют на душу, / и горних обителей всем сердцем вожделяюще, / суеты жития временного отrekliся есте, светильницы многосветлии, / чудесы, яко второе солнце, возсияли есте, / поминайте всех нас, совершающих священную память вашу, / и молитесь ко Господу спастися нам, // верою хвалящим память вашу.

Слава, глас 3:

Показаша нам образ высшего равноангельного жития угодицы твоя, Господи, / зело честни быша друзи твоя, зело утвердишася владычества их на краю земли полнощныя. / Темже, небесными украсившеся венцы, с лики безплотных веселятся / и молят Тя, Христе Боже, яко совершеннии совоинственники прехвальнии, // даровати и нам преспеяние жития, чтущим любовь святую память их.

И ныне, Богородичен, глас тойже:

Пречистая и Препоблагословенная Дево, / Рождеством Твоим истлевшее страстьми земнородных естество обновися / и, свободясь от смерти и адовых уз, / приведеса к наследию жизни вечныя. // Темже Тя вси роди достойно ублажают.

По 2-й стихологии седален, глас 6:

Равноангельное житие показаша нам отцы святии, / пламень бо огня Божественного в сердце своем стяжавше, / в постничестве и бденных подвизех преспевающе, / почести вышняго града, Небеснаго Иерусалима, достигоша. / Даруй и нам, Господи, ревнительми быти непорочнаго, праведнаго и богочестиваго

жительства / и заступлением сих угодников Твоих // неосужденно стати страшному Твоему Судищу.

Слава, глас тойже:

На земли ходивше тесною стезею, / отвергосте всех красных мира, отцы Кольстии, / вшедше в покой премирный, течением правым достигосте широты Небесных, / славяще выну Царя Славы, Господа Вседержителя, / да и Той, призрев на смиренное моление наше, / очистит наша души и телеса от всякия скверны плоти и духа // и дарует нам преспеяние жития и веры и разума духовнаго.

И ныне, Богородичен, глас тойже:

Непостижимому и неизреченному, / купно же славному и ужасному таинству вочеловечения Бога Слова дивящися, / в преклонении душ и сердец наших / пред Тобою, Дево Пречистая, ликовствующе, взываем: // радуйся, Благодатная, Господь с Тобою.

Величание:

Ублажаем вас, / вси святии земли Кольския, / и чтим святую память вашу, / вы бо молитесь за нас // Христа Бога нашего.

Псалом избранный:

Терпя, потерпех Господа, и внят ми, и услыша молитву мою. / **П**остави на камени ноге мой и исправил стопы моя. / **С**е удалихся, бегая, и водворихся в пустыни. / **У**подобихся несыти пустынной. / **Б**дех и бых, яко птица, особыщаяся на зде. / **К**олена моя изнемогоста от поста, / и плоть моя изменися еля ради. / **П**редзрех Господа предо мною выну, яко одесную мене есть, да не подвижуся. / **В**си языцы обыдоша мя, и именем Господним противляхся им. / **Б**лагословен Господь, Иже не даде нас в ловитву зубом их. / **Х**ранит Господь души преподобных Своих. / **В**осхвалятся преподобнии во славе и возрадуются на ложах своих. / **Ч**естна пред Господом смерть преподобных Его. / **П**ойте Господеву, преподобнии Его, и исповедайте память святыни Его, во всех людех чудеса Его.

Слава, и ныне: Аллилуия: *(Трижды)*

По полиелѣи седален, глас 7:

Блажѣни естѣ, достохвальнии отцы Кольстии, / путѣм тѣсным, болѣзненным и трудным шествовасте, / имже добре ходящии о Христѣ и творящии безсмертный плод в широту райскую вводими бывають, / светолитием Христовым просвещаемии; / сего ради, у Престола Вседержителя предстоюще, молитесь, / да избавит нас Господь от всех ловащих души наша, // яко ко Господу очи наши, и Наньже точно уповаем.

Слава, глас 1:

Преподобнии и богоноснии отцы земли Кольския, / предстоящии за ны соборне Христу Богу, / утверждение всем верным будете, яже к вам припадают, глаголюще: / радуйтесь, плотию на земли, умом же на небеси пожившии; / радуйтесь, временною смертию на безконечную жизнь прешедшии; / радуйтесь, Пресвятая Троицы честнии служителие; / радуйтесь, монахов мудрии и кротции наставницы; / радуйтесь, яко и нас наставите к жизни нестареемей и присносущней теплыми молитвами вашими.

И ныне, Богородичен, глас тойже:

Яко к нерушимей стене и тихому пристанищу, / к покрову Твоему, Преблагословенная Богородице, притекающе, / влаемии волнами житейских попечений, вопием: / Владычице, покрый, соблюди и спаси на Тя уповающия / и улучшить веселия со всеми святыми сподоби.

Степенна, 1-й антифон 4-го гласа. Прокимен, глас 4: Честна пред Господем / смерть преподобных Его. **Стих:** Что воздам Господеву о всех, / яже воздаде ми?

Евангелие от Матфея, зачало 43.

По 50-м псалме стихира, глас 6:

Днесь благодать Святаго Духа нас собра / в празднование памяти Собора богоносных отец Кольских, / темже вси, сошедшеся, тако рцем: / радуйтесь, благодатнии сосуди Духа Божественнаго, / преподобнии отцы наши Трифоне, Феодорите, Варлааме, / Евфимие, Аксие, Авксентие и Тарасие, / преподобномученицы Печенжстии Ионо, Германе и Гурие / и иже с ними сто шестьнадесят мученик Печенжских, / такожде новомученицы Церкви Русския Моисее и Феодоре со иными многими, / вашим бо житием благочестным украсися Церковь Русская, / юже Господь таковыми столпы утверди, / да и нам подаст благодать Свою // молитвами вашими благомошными.

ІАНОН

Богородице со ирмосом на 6 и святых на 8, глас 6:

Песнь 1

Ирмос: *Сеченое, сечётся / море Чермное, / волнопитаемая же изсушается глубина, / тяжде купно / безоружным бывши проходима / и всеоружным гроб. / Песнь же Богокрасная воспеваеся: // славно прославися Христос, Бог наш.*

Запёв: *Вси святїи земли Кольскїя, // молїте Бога о нас.*

Приидите, вернии, согласно возвеличим Собор святых, на конце края полнощного просиявших, / от древних родов и доньне в земли нашей полнощней Богу послуживших / и присно со Ангелы Того воспевающих: / дивен во святых Своих Христос Бог наш, славно бо прославися.

Светом Невечерним озаряеми, отцы святїи, / просвещением Истины землю Кольскую удобрили есте / и кровию мученическою напитали есте, / сего ради людие возрадовашася зело, / вельми вас почитают и восхваляют, глаголюще: / дивен во святых Своих Христос Бог наш, славно бо прославися.

Иже добродетелей подвижницы, яко истиннии воины Христа Бога, / от лопарских пустыней возсияли есте, / отечество горнее паче славы мира сего возлюбивше / и желания плотская отвергнуше, отцы богомудрии, / вся духовная стремления своя во смирение Господеви повинули есте, присно поюще Ему: / дивен во святых Своих Христос Бог наш, славно бо прославися.

Сонм светильников светлых, на конце земли просиявших, / на свещнице церковней яви Господь, / щедро насевый святое и славное отцев множество, во языцех сущих далече. / Яко истиннии воины Христа Бога, / во всяком чине и всяким подвигом Тому угодившии и имущии дерзновение ко Святей Троице, / не забудьте поминати земное Отечество ваше и молитися о нас, присно поющих Господу: / дивен во святых Своих Христос Бог наш, славно бо прославися.

Яко ангели земнии и человецы небеснии, / огнем Божественным возсияете и оживотворите пустыню, / прежде мрачну и бесплодну, / послежде, яко крин, процветшую и множество инок возрадившую, / сиянием Трисолнечнаго Божества ю озарите, / просвещающе ко спасению и наставляюще душ множество, /

благодарно вопиющих о подвизах ваших Господу: / дивен во святых Своих Христос Бог наш, славно бо прославился.

Богородичен: Вышних сил Превысшая и плотию Безплотного Родшая, Пречистая Владычице, / Сына Твоего и Христа Бога нашего / со всеми святыми земли Кольския моли о спасении душ наших.

Песнь 3

Ирмос: *Господь Сый всех и Зиждитель Бог, / созданное, Безстрастный, обнищав, Себе соедини, / и Пасха, за яже хотяше умерети, / Сам, Сый, Себе предпожре: / ядите, вопия, Тело Моё // и верою утвердитесь.*

Веселися, земле Кольская, / в тебе бо плод радости нам процвете, / преподобный Феодорит, благодатию Божией благоуханный. / Егоже величающе, Христа Бога славим, / преподобного же усердно молим: / моли спастися душам нашим.

От младенства добродетели прилежав, / сосуд Духа Святаго, преподобне Феодорите, явился еси, / чистоту и целомудрие соблюл еси, / прост и кроток, смирен сердцем, верен Богу, / истинною премудростию просвещен, отче преблаженне, был еси, / сердце свое Христу вверивый, / почестей земных не искавый, / всем помышлением к Богу простиравыйся, / отче Феодорите, моли Христа Бога о нас.

Чистоты усердный хранителю, / Божественною любовью, отче, распаляемь, / мирскую честь и богатство ни во чтоже вменив, / небесное богатство и славу вечную восприял еси. / Рекоша народи лопстии: Феодорит Русский широко ходит; / тако не убоясь тяготы, и долготы путныя, и хлада, / ниже уклонися тамо нечестивых человек сопротивления, / но вся претерпел еси и всех Богу привел еси.

Еще в телеси тленном пребыв, / безтелесными и невестественными почтен достоинствы, / по воздуху шествия творил еси. / И, яко апостол Павел, восхищаемь был еси во обители небесныя, / идеже видении неизреченными Бог посети тя. / Недужных, притекающих к тебе, благодатию Духа Святаго целил еси, / прокаженных очищал еси, / чувства покаянная в людех пробуждал еси / и многих на путь спасения и веры наставил еси.

Премудрости сокровище быв, преподобне Феодорите, / сердца неверных людей учением твоим просветил еси, благочестия семена насадив. / Темже ты вси, яко учителя премудра, достождно

ублажа́ем и мо́лим: / моли́ся Христу́, Ему́же от ю́ности порабо́тал еси́, / от наве́т вра́жиих изба́вити нас и спасти́ся душа́м на́шим.

Богоро́дичен: Огнь Божество́нный благода́тный, Влады́чице, сни́де на Тя, / и Си́ла Вы́шняго осени́ Тя; / и, я́ко Ма́терь Бо́жия и Хода́таица о ро́де христиа́нстем, мо́лишися о нас: / тем Тя вси велича́ем.

Седа́лен, глас 2:

Страны́ полно́щныя подви́жники благоче́стия, / земли́ се́верныя предста́тели те́плии яви́стеся, / отцы́ преблаже́ннии, Христа́ Бо́га моли́те о нас, / священны́й ваш Собо́р почита́ющих и любо́вию вопию́щих: / ра́дуйтеся, отцы́ предивни́и, // кра́я Ко́льскаго и всея́ Руси́ похвало́ и утвержде́ние. *(Два́жды)*

Богоро́дичен, глас то́йже:

Вся упова́ния на́ша в Тебе́, Ма́ти Де́во, иму́ще, мо́лим Тя, / я́ко святы́х сла́ву и Влады́чицу милосе́рдную: / да́руй нам, преподо́бных Твои́х ра́ди, грехо́в исправле́ние / и ино́ческому жити́ю споспеше́ствуй при́сно, // подаю́щи благода́ть Свою́ неоску́дну.

Песнь 4

Ирмо́с: *Прови́дев проро́к / та́йну Твою́ неизрече́нную, Христе́, провозгласи́: / положи́ еси́ твёрдую́ любо́вь крѣпости, О́тче Ще́дрый, / Единоро́днаго бо Сы́на, Благо́й, // очище́ние в мир посла́ еси́.*

Преподо́бне о́тче Три́фоне, / ми́ра красоту́ и сла́ву мирску́ю от люде́й отню́д возненави́дел еси́ / и на пока́яние изше́л еси́ в край се́верныя земли́, / в сокруше́нии серде́чном слеза́ми зѣмлю омака́я. / Мона́шеское жити́е па́че возлюбив, А́нгелом собесе́дник бы́ти сподобился еси́, / чудесы́ возсия́, яко́же второ́е со́лнце, во грехо́внем мра́це глубоконо́щия. / Помина́й нас, о́тче всехва́льный, соверша́ющих священну́ю па́мять твою́ и си́це глаго́лющих: / моли́ Христа́ Бо́га спасти́ся душа́м на́шим.

Вместа́ да́льняя и безве́стная прише́л еси́, о́тче наш Три́фоне, / и неве́дущим Бог тобо́ю позна́ся. / Иде́же прѣлесть почита́ема бя́ше, / та́мо ны́не люде́м, во тьме неве́рия лежа́щим, ве́ра Христа́ тобо́ю дарова́ся, / и обита́тель ве́лия процвете́. / Всех научи́л еси́ в Три́ех Ли́цах Еди́но Божество́ ве́ровати, / те́мже священну́ю Твою́ па́мять досто́должно ублажа́ем.

Пути, вводящаго в жизнь, наставник и учитель был еси / и в последних концех северных страны языки просветил еси, породив водою и Духом Святым, / Егоже благодатию недужных целил еси, от грехов тяжких очищая, / и чувства покаянная пробуждал еси, / и многих на путь спасения и веры наставил еси, отче наш Трифоне.

Богомудре отче наш Трифоне, / обитель во имя Живоначальная Троицы осуществовал еси, / юже новопросвещенная страна Кольская послежде возрасти, / тамо монахов множества песнословят и правоверную веру хвалят, / покаяющиеся учением Христа, / Егоже моли спастися душам нашим.

Шестнадцать лет апостольски трудился еси, преподобне Трифоне, / и добродетельми, яко лучами солнечными, / просветил еси неверных во стране далече, пусте и непроходне, / идеже не точию учитель и наказатель, но кормитель и строитель был еси, / и всем бысть вся, да всяко некия спасеши. / Темже ты вси достождно убожаем и молимся: / молися Христу, Емуже усердно поработал еси, / избавити нас навет вражиих и спастися душам нашим.

Богородичен: Безневестная Дево, / Яже Бога неизреченно зачещи плотию, / Мати Бога Вышняго, / Твоих рабов молебную службу приими, Всенепорочная, / и Богу Благоутробному принеси.

Песнь 5

Ирмос: *Союзом любви / свяжем, апостоли, / владычествующему всеми себе Христу возложше, / красны ноги очищашу, // благовествующе всем мир.*

Приидите, любящие преславные подвиги святых земли Кольския, / восхвалим преподобнаго Варлаама из Керети, / той бо благобытие мира сего превредил есть / и, живот свой ни во чтоже вменив, крест тяжкий взял, / Христу смирением и доблестию последовал есть. / Мы же прославляем Бога, дивнаго во святых Своих, / подающаго нам мир и велию милость.

Страданием убо першее тяжко искусився, / в пустыни же постом течение божественное совершив, / на Небеса возшел еси и ныне Христу предстоиши, Варлааме, отче преподобне, / моляся тепле за ны, поющия тя.

Духа Святаго теплотою, мудре, желание сердца твоего согрив / и зиму страстей умертвив, / погрузил еси страстей восстание в пучине скорбей, / священный отче Варлааме, / в ладии тесней возьми по морю полнощному, / многокозненную силу демонскую низложил еси / и в конец немощны твоя показал еси, / Небесная же воинства удивив терпением своим, / яко постников

подражатель и преподобных сожитель, / с нимиже молися Господи помилватися душам нашим.

Богоносе преблаженне Варлааме, / все плотское мудрование духу повинул еси, / пощения и изнурения телеснаго страданьи утвердився, / яко злато, в горниле искушено, сияя, явился еси, / приятелище был еси Духа Пресвятаго. / Поминай нас, чтущих присно память твою священную, / умоли Господа, да милостив нам будет / во множестве Своея благодати.

О, троице присноблаженная, / равночестнии старцы, заматоревшии во днех своих, Феодорите, Трифоне и Варлааме, / яко едино блаженство имущии от Бога, / пречудная и предобрая версто, / восхваляющих вы от всех лютых спасайте / теплым предстательством вашим ко Господу.

Богородичен: Изравнитися Содетелю желание ми вложи змий вселукавый, / яко пленника, мя восхити. / Тобою же, Пречистая, призван бых, обожився истинно, / Ты бо, о, Богомати, / Иже мене Обожившаго родила еси.

Песнь 6

Ирмос: *Бездна последняя грехов обыде мя, / и, волнения не кому терпя, / яко Иона Владыце, вопию Ти: // от тли мя возведи.*

Приидите, христолюбивии людие, / восхвалим ревнителей и защитителей доблественных обители Печенжския, / Иону скитоначальника Успенския пустыни, / вкупе же и сподвижника его Германа, / тии бо велию скорбь начатка злаго разорения обители прияша / и кровь свою за Христа пролияша, / сонму преподобномучеников Печенжских сопричтени быша. / Ныне же предстоят Престолу Господню / и молятся о спасении душ наших.

Многия скорби и страдания на земли смиренно претерпевше, / яко во мнозем искушении скорбей избыток радости ваша, / и яже во глубине нищета ваша избыточествова в богатство простоты ваша, / крест мученический богопокорно понесше, / ныне на Небеси радости неизреченныя наслаждаетесь, / преподобномученицы Ионо и Германе, / и в сонме святых Господа воспеваете. / Того молитесь и нам поприще земное смиренно совершити / и Царствие Божие наследовати.

Телеса ваша на растерзание предасте, блаженнии Ионо и Германе, / духу плоть покоривше, / мечем язвенным и огнем палящим смерть приясте. / Темже, венцы мученические от Господа приемше, / ныне Престолу Божию во Царствии Небеснем предстоите / и молитесь о душах наших.

Пёсньми Божёственными почитаётеся ныне досто́йно, па-
стырена́чальниче игу́мене Гу́рие, / священно́и́но́че Пахо́мие,
иероди́аконе Ио́сифе, досто́сла́вне Амвро́сие / и про́чии ино́-
цы, во оби́тели Пёченжстей подвиза́вшиися / и Христа́ ра́ди му́-
жественно пострада́вшии, / чрез мучёния тяжкая и огонь прои-
до́сте / и, я́ко ученицы́ ве́рнии преподо́бнаго Три́фона и дру́зи
Христо́вы, / в поко́й Небе́снаго Ца́рствия внидо́сте.

Прииди́те, мучениколю́бцы, / отце́в блаже́нных просла́вим, /
Пёченжских моли́твенников, / доблему́дренно во оби́тели зем-
но́й потрудившихся / и в селе́ниих небе́сных упоко́ившихся, /
вои́стину до кро́ве подвиза́вшихся. / Мо́лим вы, преподо́бнии
мученицы́, / сугу́быя венцы́ стяжа́вшия, / испроси́те нам у Го́спо-
да оставле́ние грехо́в и ве́лию ми́лость.

Богоро́дичен: Ра́дости на́шея Хода́таица яви́лася еси́, Де́во, /
и благода́ти принося́ще венёц любóвию, / ра́дуйся, вопиём Ти,
Благослове́нная Чистая, похваля́юще.

Конда́к, глас 3:

Днесь лик святы́х, в земли́ Ко́льстей Бо́гу угоди́вших, / пред-
стои́т в це́ркви и невидимо за ны мо́лится Бо́гу, / прииди́те,
христоимени́тии лю́дие, / па́мять их почти́м и возопи́им к ним: /
ра́дуйтесь, отцы́ преблаже́ннии Три́фоне, Феодори́те и Варла́-
а́ме / со мно́гими на́шего кра́я небе́сными покрови́тели, / вы бо,
я́ко зве́зды светоза́рныя, во мра́це се́вера возсия́ли есте́, / словесы́
и чудесы́ свои́ми вся просвети́вше, / и ны́не моли́тесь Го́спо-
деви / ве́ру Правосла́вную zde незы́блему соблюсти́ // и дарова́ти
нам ве́лию ми́лость.

И́кос:

Я́ко благоуха́ннии кри́ни, прозя́бшии Божёственным рачёни-
ем, / яви́лися есте́, отцы́ всечестни́и, / в земли́ необетова́н-
ней, непутней и жа́ждущей, / плод мног стори́цею принёсше, /
страну́ сию́ моли́твами и радёниями освяти́ли есте́ / и ду́ши
мно́зи ко Христу́ привели́ есте́; / сего́ ра́ди ублажа́ем вас, при́сно
пою́ще: / ра́дуйтесь, ма́слины плодови́тыя, от рая́ Господня́ про-
цвётшия; / ра́дуйтесь, све́том Христо́вым от восто́ка духо́внаго
возсия́вшии; / ра́дуйтесь, земли́ Ко́льския предивни́и чудотво́р-
цы и те́плии о нас пред Бо́гом моли́твенницы. / Ны́не моли́тесь
Го́сподеви ве́ру Правосла́вную zde незы́блему соблюсти́ // и да-
рова́ти нам ве́лию ми́лость.

Песнь 7

Ирмос: *Отроцы в Вавилоне / пещнаго пламене не убоишася, / но, посреде пламене ввержени, / орошаеми, пояху: // благословен еси, Господи, Боже отец наших.*

Тленная и земная наслаждения отринув, / пустынное житие возлюбил еси, славный Евфимие, / обители Николо-Корельския украсителю, церквей и скитов многих зиждителю, / в богомыслии и молчании пребывая, / благочестие лику иноческому показал еси предивно, / богоносе Евфимие, отче наш.

Многосветлыми лучами блистают деяния твоя, преподобне отче Евфимие: / брега в последних концах северных страны / церквами и скитами, яко древами масличными, украсил еси. / Долготу путную и опасности моря ни во чтоже вменяя, / пустынножития рачительство восхваляя, дошед даже до Норвежския земли, / не убоился еси врагов крепких и бранноискусных, / пустыни полнощныя облистав светом благочестия.

Постническое и равноангельное житие приемше, / преподобнии отцы Аксие, Авксентие и Тарасие, / в Поморие пустынное удалилися есте, аки в тихое пристанище, / на наволок Кашкаранский вселилися есте и многая лета тамо пожили есте / и, непрестанныя молитвы, яко копие в руках, имуще, / крепко победили есте бесовская ополчения, / благодать приемше целити недуги душ и телес наших. / Тем зовем вам: / радуйтесь, преподобнии отцы Аксие, Авксентие и Тарасие, / монахов удобрение.

Троице святая Кашкаранская, / Соловецкаго отока отрасли многоплодная, / в правиле иночестем возсиявшая светло, / преподобнии отцы Аксие, Авксентие и Тарасие, / поминайте любовию хвалящая вас.

В море Ледоватом успение обрел еси, Безымянне, / в телеси нетление стяжал еси, преподобне, / неведомый миру иноче земли Терския, но Богови ведомый и чудесами явленный. / В ловитве рыбней помощниче скорый и целителю усердный в немощех и болезнях, / преподобне Безымянне иноче, моли Христа Бога спастися душам нашим.

Богородичен: *Явилася еси Дева и Мати, паче естества, Богородительнице, / Слово зачешая Отчее, воплощенно Сие рождши, / Имже ныне спасаеми, Тя, Богородице, величаем.*

Песнь 8

Ирмос: *За законы отеческия / блаженнии в Вавилоне юноши, предбедствующе, / царюющаго оплеваша повеление безумное / и, совокуплени, имже не сваришася огнем, / Державствующему достойную воспеваху песнь: / Господа пойте, дела, // и превозносите во вся веки.*

Святїи новомученицы и исповедницы Кольстїи, / светолепнии архиереи и священники, / иноцы, инокини и миряне, / вернии Господеву мужие, жены и чада, / на севере жестокии гонители собраннии и в каторжных работах умученнии, / за Христа кровь пролившии, / отцы, братие и сестры наши, / за Господа смерть приявшии, / испросите у Человеколюбца Бога грехов прощение вопиющим: / Господа пойте, дела, и превозносите Его во веки.

Земля северная присно вами хвалится и веселится, / святїи новомученицы и исповедницы Кольстїи, ведомии и неявленнии, / в годину лютых искушений Христа не отвергостесь, но до смерти Его исповедаете. / Того прилежно молитесь подати велию милость вас чтущим / и Богу вопиющим: Господа пойте, дела, и превозносите Его во веки.

Святых Таин Христовых верный служителю, / покаяния проповедниче и края Кольскаго печальниче, / уподобился еси пророку Моисею, / душу свою за погибающую паству положил еси, / узы темничныя и смерть за Христа претерпел еси, / спасай нас молитвами твоими, отче Моисее, вопиющих: / Господа пойте, дела, и превозносите Его во веки.

Преподобномучениче Феодоре, / злострадания от безбожных и горькия работы претерпел еси, / Церкви послушание даже до смерти явил еси, / сего ради венцем мученическим венча тя Христос Бог, / Егоже моли, благодарованный заступниче земли Кольския, / да очистимся от всякия скверны покаянием / и прославим Христа Содетеля во вся веки.

О, преславнаго чудесе! / Узре Господь гордая времена, / и скончана суть, и беззакония его исполнишася, / и возсияша с веселием новомученицы в земли полнощней, / и мрак прелести неверия отгнаша, / и козни бесовския, яко исчезает дым, исчезоша, / и возраде правда, и посрамлено бысть нечестие. / Радуются вернии и праздник новоявленным угодником составляют, / вопиюще Христу Богу: / Господа пойте, дела, и превозносите Его во веки.

Богородичен: Зрящи поругание земли Кольския, / скорбяше Пречистая Мати и всеильную помощь страждущим людем простираще, / Сына же Своего усердно моляше, взывающи: / да бла-

гословит Господа земля северная, свободившись от ига безбожного, / и превозносит Его во веки.

Песнь 9

Ирмос: Странствия Владычня / и Безсмертныя Трапезы на Горнем месте / высокими умы, / вернии, приидите, насладимся, / возшедша Слова, / от Слова научившися, // Егоже величаем.

Процвели есте в постнических юдолах, достохвальнии отцы наши, / яко цветы многоцветнии и яко крины сельнии, / облагоухали есте души верных добродетельми своими и чудесы, / в истинней вере наставляюще. / О, всеблаженнии, преподобным сожителие и постников похвало, / о нас молитесь ко Господу помиловаться душам нашим.

Песнями величаем вас, преподобнии, / вся хотения Господни исполнивши, / многия скорби в мире претерпевши, / в молитве Богу беседовавши, / житием своим диавола поправши, / на Небеса со славою возведеннии, / с лики Ангельскими в вечныя обители Отца Небеснаго вселеннии, / спасайте нас от грехов молитвами вашими, / да утвердимся в вере Православней.

Отцы предивнии и всечестнии, / земли Кольския молитвенницы и покровители, / подвигом добрым подвизаетесь, / течение жизни дольней скончаете, веру свято соблюдосте; / ныне, радуящиеся и веселящиеся в преславных селениях Отца Небеснаго, / почести обетованныя прияете, / не отрините убо и наших молитв, / любовьию вас убожающих.

Приидите, братие, с похвалами воспойм полк угодников Христовых, / вменивших звезду Полярную во звезду Вифлеемскую, / мраза и тьмы на конце края полнощнаго не убоявшихся / и разжженною ревностию козни вражия попаливших. / Воинство доблестнейшее, священнейший Соборе, / возсияли есте преславно, лучезарныя зари, / и вселилися есте в незаходимый свет Царствия Христова.

Днесь с нами собор постников и молитвенников веселится, / преподобных и молчальников сословие ликовствует, / мучеников и страстотерпцев лик радуется и Бога славит, / и Церковь Христова ими украшается. / Темже, братие вернии, любовьию прославим вся святыя земли нашея, / яко сыны и дочери Отца Небеснаго, / ко Отчеству вечному нас возводящия.

Богородичен: Юница Нескверная, Юнца Божественного Родшая, / прими молитву рабов Твоих; / да восхваляем Тя, яко Хранительницу земли нашея / и Заступницу всего рода христианскаго.

Светилен, глас 4:

Свѣтом па́че со́лнца на Небеси́ божѣственно блиста́юще / просвети́лися есте́, вси святи́и земли́ Ко́льския, / и, Божѣственным сия́нием трисия́нным ум сво́й просвѣщше, / Еди́наго проповѣдасте Честны́я Тро́ицы Христа́ Го́спода, / честны́и ста́рцы богому́дрии, / и Тем зе́млю полно́щную озари́сте, / дея́ньми сла́вными насади́сте ве́ру Правосла́вную; // сего́ ра́ди вас ублажа́ем. *(Два́жды)*

Сла́ва и ны́не, глас то́йже:

Днесь всеми́рная ра́дость ве́лия возсия́: / дарова́ся цельбоно́сная, Влады́чице, ико́на Твоя́ Тихвинская-Му́рманская. / Вси святи́и земли́ Ко́льския ру́ки к ней протира́ют, моля́щися, / и с ними́ страна́ полно́щная, ра́дуясь, торже́ствует. / Те́мже мы ду́ховно пра́зднуем и те́пле вопи́ем Ти: / не лиши́ нас Твоея́ ми́лости, // но пребу́ди с на́ми вове́к, Всеблага́я.

На хвали́тех стихи́ры на 4, глас 8:

Равночи́слени Тро́ицы Несозда́нныя су́ще, / преподо́бнии отцы́ на́ши Феодори́те, Три́фоне и Варлаа́ме, / с ли́ки Ангелов и ины́ми чи́ны уго́дников земли́ Ко́льския / ра́дующеся, предста́йте Престо́лу Божества́, му́дрии. / Сего́ ра́ди исто́чник исцелений ве́рным пода́ете / и Божѣственное просвѣщѣние пребыва́лищу на́шему. / О, уго́дницы Христо́вы достосла́внии, // о нас при́сно моли́тесь ко Го́споду.

Изра́ннии от Бо́га святи́и сродни́цы на́ши, / в ми́ре пожившии, оба́че не от ми́ра су́щии, / вы есте́ соль земли́ на́шея, / ва́ми бо гра́ди и ве́си на́ша освяща́ются, / пу́ти стро́потныя исправля́ются, / заблуждшии к покая́нию обра́щаются, / и вси прославля́ют дивна́го во свята́х Свои́х Иису́са Всеси́льна, // Спа́са ду́ш на́ших.

Отцы́ Собора́ Ко́льскаго, / воспѣвшии в земли́ се́верней Содѣтеля́ Отца́ Бо́га, / жити́ем сво́им превозне́сшии Всесвята́го Ду́ха, жизнь Подава́ющаго, / Христа́ Влады́ки благове́стие язы́ку ло́пскому проповѣда́вшии / и во И́мя Святы́я Тро́ицы крестившии, / моли́тесь за ны, отцы́ достохва́льнии, // по́йте Трине́динаго Бо́га и превозносите́ Его́ во ве́ки.

Сла́ва, глас то́йже:

Ублажа́ем вас, преподо́бнии отцы́ земли́ на́шея Ко́льския, / вы бо, поучивше́ся день и но́щь в зако́не Господни, / сподо́би́стесь дре́ва живото́наго снасаждѣ́ни бы́ти, / и плод трудо́в и стра-

да́ний ва́ших венцы́ процветé. / Ны́не в сия́нии сла́вы Христо́вы живе́те, весе́лящеся, / се́го ра́ди достохва́льную па́мь ва́шу со-верша́ем, // в моли́твах по́мощь ва́шу призы́вающе.

И ны́не, Богоро́дичен, глас то́йже:

Влады́чице, приими́ моли́твы раб Твои́х // и изба́ви нас от вся́кия ну́жды и печа́ли.

Славосло́вие вели́кое, ектений и отпу́ст

НА ЛИТУРГИИ:

Проки́мен, глас 7: Восхва́лятся преподо́бнии во сла́ве / и возра́дуются на ло́жах свои́х. **Стих:** Свяще́нницы Твои́ облеку́тся в пра́вду, / и преподо́бнии Твои́ возра́дуются. **Апо́стол к Гала́том, зача́ло 213.** Аллилу́ия, **глас 4:** Воззва́ша пра́веднии, и Госпо́дь услы́ша их, / и от всех скорбе́й их изба́ви их. **Стих:** **Мно́ги ско́рби пра́ведным, / и от всех их изба́вит я Госпо́дь.** **Ева́нгелие от Луки́, зача́ло 24.** **Прича́стен:** Ра́дуйтеся, пра́веднии, о Го́споде, пра́вым подоба́ет похва́ла.

ЯКЯФИСТ

Собору святых отцов, в земле Кольской просиявших

Конда́к 1

Днесь ра́дуйся, душе́, и ликуйте, собо́ри празднолю́бнии, / **Д**яко до Се́вера Кра́йняго и мо́ря Ледова́таго приидо́ша ча́да Госпо́дня. / Днесь в полунощней идо́льстей тьме возсия́ благода́ть ве́ры, / мгла разгна́ся, облиста́ свет, / туман разсе́ся и взы́де Со́лнце Пра́вды. / Днесь Це́рковь земли́ Ко́льския прино́сит Бо́гу плоды́: / се аз и де́ти, яже ми даде́ Бог; / от вся́ких нас бед и напáстей свобо́ждайте, свя́тии, благоприя́тными ва́шими моли́твами, / да со умиле́нием взыва́ем си́це: /

Ра́дуйтеся, вси́ свя́тии земли́ Ко́льския, // Це́ркве Христо́вы похва́ло и украше́ние.

И́кос 1

Приидите, лю́дие, воспо́им собо́р анге́лоподобных, / воспри-
явших ве́ры щит, / отринувших страсте́й тьму, / я́же бы́ша
кре́пции в невидимых бранех, / скита́ющихся в пусты́нях лопар-
ских, / и в гора́х, и в про́пастех земных, / обративших в бе́гство
полки́ бесо́в, / да́же до кро́ви пострадавших / и му́ки многораз-
личныя от безбо́жных претерпе́вших. / Мы же, ве́рою серде́ч-
ною от ду́ши подвиза́еми / и благоговения́ ду́хом исполня́еми, /
помина́ем сла́вныя по́двиги ва́ша / и гла́сы хвале́бными зове́м
тако́вая:

Ра́дуйтесь, на зов Госпо́день ра́достно прите́кшии;

Ра́дуйтесь, всем жела́нием Христу́ последовавшии.

Ра́дуйтесь, Святы́м Ду́хом разу́м соверше́нный стяжавшии;

Ра́дуйтесь, идо́льскую лесть от земли́ полу́нощней изгна́вшии.

Ра́дуйтесь, оби́телей и церкве́й зиждителие неусыпа́еми;

Ра́дуйтесь, благове́стницы Христо́вы, на Небесе́х прославля́еми.

Ра́дуйтесь, открове́ниями незрече́нными просвеще́нии;

Ра́дуйтесь, си́лою апо́столов земли́ се́верныя ода́реннии.

Ра́дуйтесь, вси́ святии земли́ Ко́льския, // Це́ркве Христо́вы
похва́ло и украше́ние.

Конда́к 2

Ангела земна́го и небе́снаго челове́ка, / оби́телей и церкве́й
зиждителя́ неусыпа́емаго, / преподо́бнаго отца́ на́шего Фео-
дори́та почти́м, / се́мя пра́вды евангелски́я во язы́цех земе́ль
се́верных посе́явшаго / и вся сия́ ко Христу́ приве́дшаго, / и про-
сла́вим апо́стольски́я по́двиги его́. / Ангелское́ твоё во плоти́
жити́е прови́дев, преподо́бне, / всея́ тва́ри Созда́тель от изде́тка
предо́брой ю́ности твоея́ до се́дин ста́рости / угото́ва ты в сосу́д
целому́дрен и че́стен, / те́мже си́це вопие́м Госпо́ду: // Алилу́ия.

И́кос 2

Возсия́ла е́сть ва́ми, досто́блаже́ннии отцы́, / во стране́ Ко́ль-
стей сла́ва И́стиннаго Бо́га, в Тро́ице покланя́емаго: / ё́юже
просла́вишася примо́рски́я зе́мли и морсти́и ото́цы, / и Це́рковь
право́сла́вная, хвалу́ воздаю́щи / се́му́ досто́чтимо́му собо́ру пре-
подобных оте́ц, / по досто́янию поёт вам:

Ра́дуйтесь, бла́гое и́го Христо́во люботру́дно понесе́ши;

Ра́дуйтесь, да́ры Ду́ха Свята́го всем се́рдцем восприе́мшии.

Ра́дуйтесь, я́ко трезвене́нием дух свой во огонь разже́гли есте́;

Ра́дуйтеся, я́ко вся красная́ мира сего́ ни во что́же вмени́ли есте́.
Ра́дуйтеся, крѣпкое хранѣние усто́м своимъ полага́вшии;
Ра́дуйтеся, во е́же не́кия спасти́, всемъ вся бы́вшии.
Ра́дуйтеся, правосла́вныя святости́ предобра́я версто́;
Ра́дуйтеся, послѣднихъ земли́ се́верныя сла́вная красото́.
Ра́дуйтеся, вси́ святѣи земли́ Ко́льскія, // Це́ркве Христо́вы
похвало́ и украше́ние.

Конда́к 3

Избравшу́ тя Пастыреначальнику́ Христу́ во апо́стола страны́ се́верныя, / а́бие отринул еси́, досточудне Трифоне, мира сего́ красная́, / претерпѣл же еси́ всяко озлобле́ние, / благовести́л еси́ сидящимъ во тьме и сѣни смѣртней Бо́га, плоти́ю явльшаго́ся, / и обитель ве́лию Святы́я Трои́цы на Печензе́ воздвигл еси́, и мона́хов мно́жество собрал еси́, / те́мже со апо́стола сра́дуется дух твой, / воспева́я ко Христу́ Бо́гу: // Аллилу́ия.

И́кос 3

Взы́де к Бо́гу моли́тва вели́кя Лапланди́и Ангела, / и в преде́лах мра́чныя По́хъелы́ яви́ся вои́нство Христо́во, / провозвѣстни́цы благода́ти, учи́телие пока́яния, / глаша́таи жи́зни ве́чныя. / Все́ сѣи́ послу́шествовани́ бы́ша ве́рою ева́нгельскою, / и стрясе́ земля́ Ко́льская тьму́ мракобеси́я. / Мы же, ви́дяще чу́дное Бо́жие смотре́ние о срѣтении́ сем, / вопи́емъ вамъ си́це:

Ра́дуйтеся, страна́нии, взыску́ющии Оте́чества Го́рняго;
Ра́дуйтеся, крѣпци́и, гна́вшии стра́сти тлетво́рныя.
Ра́дуйтеся, ми́ра избе́гшии, на брега́ морскія́ пришѣдшии;
Ра́дуйтеся, по́двигомъ ва́шимъ мно́гихъ ко Христу́ привѣдшии.
Ра́дуйтеся, Святы́я Трои́цы благода́тная селе́ния;
Ра́дуйтеся, я́ко нам неразу́мнымъ возвеща́ете То́я велѣ́ния.
Ра́дуйтеся, заветовъ Христо́выхъ ве́рнии храните́лие;
Ра́дуйтеся, Ева́нгельскихъ смы́слов и́стиннии любите́лие.
Ра́дуйтеся, вси́ святѣи земли́ Ко́льскія, // Це́ркве Христо́вы
похвало́ и украше́ние.

Конда́к 4

Избра́нный чудотво́рче и уго́днице Христо́в, Варлаа́ме, / ве́рный учени́че преподо́бнаго Феодорита́ и дру́же преподо́бнаго Трифона́, / неду́гов душе́вныхъ и телѣсныхъ ско́рый целите́лю, / в мо́ри пу́тиѣ твой, и сте́зи твоя́ в вода́х мно́гих, / я́же слеза́ми моли́твы омы́л еси́ и о́браз пока́яния нам дарова́л еси́. / Приими́ от нас с

любовію приносимое тебе хвалебное пение, / помози и нам, отче преподобный, такожде покаяться, / да благодатию Духа очистишься, / и да поем тобою благодѣющему нам Богу: // Аллилуія.

Икос 4

Кто не удивится любви вашей к Богу, / о, троице равноапостольная, / Феодорите блаженне, Трифоне преподобне, Варлааме всехвальне, / со ученики вашими верными! / Како вменили есте звезду Полярную во звезду Вифлеемскую / и радостно направили есте стопы своя при бреже Ледоватаго моря / в край северныя страны. / Темже народу лопскому добрии пастырие и любящии отцы явились есте, / пустыню непроходную благою вѣстиею огласивше, / да воспоет вам народ новопросвещенный сицевая:

Радуйтесь, иго Христова на себе восприемшии;

Радуйтесь, плоть свою духови покорившии.

Радуйтесь, на краю земли, яко апостолы, послужившии;

Радуйтесь, во трудех духовных в пустынях подвизавшиися.

Радуйтесь, духов злобы лапландския не устрашившиися;

Радуйтесь, свою волю греховную отсекати научившиися.

Радуйтесь, откровением помыслов своих укрепившиися;

Радуйтесь, благодатию Духа Святаго умудрившиися.

Радуйтесь, вси святїи земли Кольския, // Церкви Христовы похвало и украшение.

Кондак 5

Приидите вси, верное стадо Христова, духовно сошедшеся, / днесь восхвалим благочестиваго вкупе и монашескаго кореня святую отрасль, / дивнаго старца Иону с доблим сомолитвенником Германом, / Христа до смерти возлюбившия / и Сего ради вражее неправедное зачатие и огонь язвятий претерпевшия, / благоуханием исполнивше небесная / и сердечное око к Богу вперивше, / воспели Ему есте: // Аллилуія.

Икос 5

Киими похвалами восхвалим преподобных отцев Собор? / Киими славословлени прославим светоносную память их? / Велие торжество земли нашея святых память явися. / Ныне, прославльшему вас Христу предстояще, / молитесь о нас прилежно. / Мы же, суетою помраченнии и во гресех все житие иждившии, / дивящися подвигам вашим пустынным, / вопиём с благодарением сердечным:

Ра́дуйтеся, отше́льницы и молча́льницы предив́нии;
Ра́дуйтеся, моли́твенницы о земли́ Росси́стей усер́днии.
Ра́дуйтеся, свещи́ неугаси́мая, в пусты́ни дивей пламенёв́шия;
Ра́дуйтеся, вся́ мира́ сего́ краса́я Бо́га ра́ди презре́вшии.
Ра́дуйтеся, за Христа́ страда́ния претерпе́вшии;
Ра́дуйтеся, любви́ ра́ди Бо́жия сла́вную сме́рть прие́мшии.
Ра́дуйтеся, земни́и а́нгели и челове́цы небес́нии;
Ра́дуйтеся, Христо́ви избра́нницы ве́рнии и благоче́стнии.
Ра́дуйтеся, вси́ святы́и земли́ Ко́льския, // Це́ркве Христо́вы похва́ло и украше́ние.

Конда́к 6

Боготеч́ныя звёзды, / путево́дящия к Со́лнцу Пра́вды, Христу́ Бо́гу, яви́лися есте́, / пасты́ренача́льниче игу́мене Гу́рие, / священнои́ноче Пахо́мие, / иероди́аконе Ио́сифе, / досто́славне Амвро́сие / и про́чии сто ше́стьна́десять и́ноков и бельце́в, / во оби́тели Пе́ченжстей подвиза́вшиися / и Христа́ ра́ди му́жественно постра́давшии, / чрез муче́ния тяжка́я и огнь бо прои́доште / и, я́ко уче́ницы ве́рнии преподо́бнаго Трифо́на и дру́зи Христо́вы, / жи́зней своих не пощади́сте за Го́спода своего́, / но, же́стоко би́ени и огнём опаля́еми бы́вшие, / взыва́ли есте́ к Нему́ велегла́сно: // Аллилу́иа.

И́кос 6

Я́ко многосвётлыя звёзды, / добродетелей свётлостию озра́яете ве́рных исполне́ния, / преподо́бнии отцы́ на́ши и вси́ Бо́жии уго́дницы земли́ Ко́льския. / Совоку́плься Собо́р святы́х Твои́х, Го́споди, ра́ди любви́ / и, тоя́ наслажда́ющесе, со А́нгелы лику́ет о Тебе́, Всеви́дче Го́споди всех, / его́же ликовствова́ния да и нас сподо́биши / моли́твами уго́дников Твои́х, Всеси́льне, / и на́шими провеща́нии сицевы́ми:

Ра́дуйтеся, измла́да Иису́са Христа́ возлюбив́шии;
Ра́дуйтеся, гла́са Па́стыря До́браго возжелёв́шии.
Ра́дуйтеся, идо́льския ле́сти усер́днии истреби́телие;
Ра́дуйтеся, диа́вольских ко́зней дерзнове́ннии обли́чителие.
Ра́дуйтеся, му́жество и кре́пость в страда́ниях тяжких явив́шии;
Ра́дуйтеся, твёрды́м испове́данием ве́ру запечатлёв́шии.
Ра́дуйтеся, оби́телем Христо́вым похва́ло и утвержде́ние;
Ра́дуйтеся, Це́ркве Ру́ския сла́во и похва́ление.
Ра́дуйтеся, вси́ святы́и земли́ Ко́льския, // Це́ркве Христо́вы похва́ло и украше́ние.

Кондак 7

Тлѣнная и земная наслаждения отринув, / пустынное житие возлюбил еси, славный Евфимие, / брега в последних концех северных стран / церквами и скитами, яко древами масличными, украсил еси. / Долготу путную и опасности моря ни во что же вменяя, / дошед даже до Норвежския земли, / пустынножития рачительство восхваляя, / на высоту добродетелей восшел еси, / Богу хвалебную песнь поя: // Аллилуия.

Икос 7

Края полнощнаго подвижницы благочестия, / за грады и веси на концех земли предстатели теплии явистесь, / отцы преблаженнии. / Христа Бога молитесь о нас, / священный ваш Собор почитающих и любовь вопиющих: / радуйтесь, земли Кольския и всея Руси похвало и утверждение. / Мы же, взирающе на дела ваша славная, / вопием вам сице:

Радуйтесь, многих чудес творения от Господа приемшии;

Радуйтесь, духовных чад множество во Христе породившии.

Радуйтесь, истин боговедения вернии рачителие;

Радуйтесь, Пресвятая Троицы теплии служителие.

Радуйтесь, пестуны искуснии и попечители ревностнии;

Радуйтесь, сокрушившии демонов немощныя дерзости.

Радуйтесь, незаходимая сияния и сполохи мысленнии;

Радуйтесь, козней бесовских победителие выспреннии.

Радуйтесь, вси святии земли Кольския, // Церкви Христовы похвало и украшение.

Кондак 8

Постническое и равноангельное житие приемше, / преподобнии отцы Аксие, Авксентие и Тарасие, / в Поморие пустынное удалилися есте, яко в тихое пристанище, / на наволок Кашкаранский вселилися есте, и многая лета тамо пожили есте, / и, непрестанныя молитвы, яко копие, в руках имуще, / крепко победили есте бесовская ополчения, / благодать приемше целити недуги душ и телес наших. / Мы же прославлявльшему вас Богу всерадостно взываем: // Аллилуия.

Икос 8

Отцы предивнии и всечестнии, / земли Кольския молитвенницы и покровителие, / подвигом добрым подвизаетесь, / течение жизни дольней скончаете, / веру свято соблюдосте; / ныне,

ра́дующеся и весе́лящеся в пресла́вных селе́ниях Отца́ Небе́снаго, / по́чести обетова́нныя прия́сте, / не отрини́те у́бо и на́ших моли́тв, / я́ко, да ублажа́юще любóвию, / прославля́ем вы си́це:

Ра́дуйтеся, и́стины Христо́вы твёрдии ревни́телие;

Ра́дуйтеся, вражды́ и нестро́ений всегро́знии обли́чителие.

Ра́дуйтеся, крест свой терпели́вно нести́ уча́щи;

Ра́дуйтеся, во е́же не́кия спасти́, всем вся бы́вшии.

Ра́дуйтеся, благо́е и́го Христо́во смире́нно понёсшии;

Ра́дуйтеся, в терпéнии ва́шем ду́ши ва́ша стяжа́вшии.

Ра́дуйтеся, ре́вности о Христé Иисусе испо́лнении;

Ра́дуйтеся, того́ ра́ди в Ца́рствие Бо́жие вни́ти удо́сто́еннии.

Ра́дуйтеся, вси святи́и земли́ Ко́льския, // Це́ркве Христо́вы похвало́ и украше́ние.

Конда́к 9

О, пресла́внаго чудесе́! / Узре́ Госпо́дь го́рдая времена́, / и се, сконча́на суть, и беззако́ния его́ испо́лнишася, / и возсия́ша с весе́лием новомученицы́ в послéдних земли́, / и преле́сти неве́рия мрак отгна́ша, / и ко́зни бесо́вския, я́ко исчеза́ет дым, да исчеза́ша, / и возрастé пра́вда, и посра́млено бысть нече́стие. / Ра́дуются ве́рнии и пра́здник новоявле́нным уго́дником составля́ют, / вопию́ще Христу́ Бо́гу: // Аллилу́ия.

И́кос 9

Святи́и новомученицы́ и испове́дницы́ Ко́льстии, / светоле́пнии архиере́и и священни́цы, / ино́цы, ино́кини и миря́не, / ве́рнии Госпо́деви му́жие, жены́ и ча́да, / на Се́вере жесто́кими гоните́ли собра́ннии / и в ка́торжных рабо́тах умученнии, / за Христа́ кровь проли́явшии, / отцы́, бра́тие и се́стры на́ша, / за Госпо́да смерть прия́вшии, / испроси́те у Человеколю́бца Бо́га грехо́в прощéние / вопию́щим си́це:

Ра́дуйтеся, Крест Госпо́день дерзнове́нно подъя́мшии;

Ра́дуйтеся, го́рнюю сла́дость е́ще на земли́ вкуси́вшии.

Ра́дуйтеся, враго́в Це́ркве Христо́вы обли́чителие;

Ра́дуйтеся, нече́стивых витий безбо́жных посра́мителие.

Ра́дуйтеся, ве́рнии, зло́бных гоните́лей не убоя́вшиися;

Ра́дуйтеся, крѣпции, у́зы темни́чныя и смерть претерпе́вшии.

Ра́дуйтеся, я́ко мучéния лю́тая ни во что́же вмени́ли есте́;

Ра́дуйтеся, я́ко в страда́ниих ва́ших Бо́га просла́вили есте́.

Ра́дуйтеся, вси святи́и земли́ Ко́льския, // Це́ркве Христо́вы похвало́ и украше́ние.

Кондак 10

Святы́х Та́ин Христо́вых ве́рный служи́телю, / покая́ния пропове́днице и кра́я Ко́льскаго печа́льнице, / уподо́бился еси́ проро́ку Моисе́ю, / ду́шу свою́ за погиба́ющую па́ству положи́л еси́, / у́зы темни́чныя и смерть за Христа́ претерпе́л еси́, / спасай нас моли́твами твои́ми, о́тче Моисе́е, вопию́щих: / Го́спода пойте, дела́, и превозносите Его́ во ве́ки. // Аллилу́ия.

Икос 10

Днесь с на́ми собо́р по́стников и моли́твенников веселится, / преподо́бных и молча́льников сосло́вие ликовству́ет, / му́чеников и страстоте́рпцев лик раду́ется и Бо́га сла́вит, / и Це́рковь Христо́ва ими украша́ется. / Те́мже, бра́тие ве́рнии, / любо́вию просла́вим вся святы́я земли́ на́шея, / я́ко сы́ны и дще́ри Отца́ Небе́снаго, / ко Оте́честву ве́чному нас возводя́щая, и песнь воспо́им благода́рственно:

Ра́дуйтесь, мно́ги му́ки и ско́рби до кро́ве прия́вшии;

Ра́дуйтесь, поко́й вре́менный правды Бо́жия ра́ди презре́вшии.

Ра́дуйтесь, немо́щи сме́ртных теле́с ни во что́же вмени́вшии;

Ра́дуйтесь, неверных уче́нии свои́ми удивив́шии.

Ра́дуйтесь, любве́ ра́ди Госпо́дни муче́ния претерпе́вшии;

Ра́дуйтесь, о́вцы Христо́вы во еди́но ста́до совокупив́шии.

Ра́дуйтесь, олядене́вшая сердца́ их моли́твой согре́вшии;

Ра́дуйтесь, свети́льницы, дарова́нии духо́вными горев́шии.

Ра́дуйтесь, вси святы́и земли́ Ко́льския, // Це́ркве Христо́вы похвало́ и украше́ние.

Кондак 11

В мо́ре Ледова́том успе́ние обрел еси́, Безымя́нне, / в телеси́ нетле́ние стяжа́л еси́, преподо́бне, / неве́домый ми́ру ино́че земли́ Те́рския, / но Бо́гови ве́домый и чуде́сами явле́нный. / В лови́тве ры́бней помо́щнице ско́рый / и целите́лю усерд́ный в немо́щех и боле́знях, / преподо́бне Безымя́нне ино́че, / моли́ Христа́ Бо́га спастися́ нам, / со смире́нием Благода́телю Бо́гу песнь воспева́ющим: // Аллилу́ия.

Икос 11

Отцы́ предив́нии и всечестни́и, / земли́ Ко́льския моли́твенницы и покрови́телие, / по́двигом до́брым подвиза́стесь, / те́чение жи́зни до́льней сконча́сте, / ве́ру свято́ соблюдо́сте, / ны́не,

ра́дующеся и весе́ляющеся в пресла́вных селе́ниях Отца́ Небе́снаго, /
по́чести обетова́нныя прия́сте, / не отрините́ у́бо и на́ших моли́тв, /
я́ко, да любоче́стно ублажа́юще, / любо́вию прославля́ем вы си́це:

Ра́дуйтеся, о́бразы нищеты́ духо́вныя благови́днии;

Ра́дуйтеся, избра́ннии воители́ Христо́ви досточу́днии.

Ра́дуйтеся, вся́ мира́ сего́ кра́сная Бо́га ра́ди презре́вшии;

Ра́дуйтеся, уста́ на похвале́ние Го́спода употреби́вшии.

Ра́дуйтеся, богомы́слия и молча́ния ве́рнии ревни́телие;

Ра́дуйтеся, безбо́жия и нече́стия бо́дростнии обли́чителие.

Ра́дуйтеся, нас, су́щих в ско́рбех, наде́ждою осиява́ющи;

Ра́дуйтеся, вме́сто вре́менных ве́чная нам предлага́ющи.

Ра́дуйтеся, вси́ святии́ земли́ Ко́льския, // Це́ркве Христо́вы
похвало́ и украше́ние.

Конда́к 12

О, пресла́внаго чудесе́, / дивнии́ уго́дницы Бо́жии, / я́ко дре-
ва́ ма́сличная, в беспло́дней пусты́ни земли́ Ко́льския про-
цве́тшии, / на́ми славосло́вятся днесь. / О, преподо́бнии му́жие, /
му́ченицы и страстоте́рпцы земе́ль се́верных, / от родо́в на́ших
прозя́бшии, / се́янна небеса́наго кла́сы духо́внии, / плод стори́-
цею Го́споду сотвори́вшии, / почти́м вы се́рдцем и уста́ми, / да бла-
гоприя́тно чудоде́ющему в вас Бо́гу вопие́м: // Аллилу́ия.

И́кос 12

Воста́ни с на́ми, правосла́вный собо́ре вселе́нский, / про-
сла́вим Благоде́теля всех Бо́га, / воздвигша́го сла́вный Собо́р
подви́жников Ко́льских, / по́двиги равноапо́стольныя в се́вер-
ных преде́лах Святы́я Руси́ сотвори́шиа, / пра́вду Бо́жию неве́ду-
щим наро́дам возвестив́шиа / и по́двиг крестоноше́ния zde по-
не́сшиа. / Хвали́м вас, досточу́днии, и ублажа́ем достопа́мятная
жития́ ва́ша, / воспева́юще песнь благодарения́:

Ра́дуйтеся, сосу́ди избра́ннии, добродете́льми украше́ннии;

Ра́дуйтеся, си́льнии, немощны́я собрав́шии и расточе́ннии.

Ра́дуйтеся, му́жества и терпе́ния му́дрии наста́вницы;

Ра́дуйтеся, последи́х земли́ сла́внии избра́нницы.

Ра́дуйтеся, неду́гов на́ших ми́лостивии целите́льницы.

Ра́дуйтеся, бо́дри Правосла́вныя ве́ры поборо́нницы;

Ра́дуйтеся, ва́ми бо мрак губи́тельный от нас удаля́ется;

Ра́дуйтеся, ва́ми бо Дух Госпо́день на нас изли́вается.

Ра́дуйтеся, вси́ святии́ земли́ Ко́льския, // Це́ркве Христо́вы
похвало́ и украше́ние.

Конда́к 13

О, Всеблаже́ннии и всяких похвалéний превы́шнии, / преподобнии отцы́ на́ши Ко́льстии, / примите ма́лое сиé на́ше вам приноше́ние, / умо́лите Подвигополо́жника и Совершите́ля Иису́са, / да сохранит край наш се́верный, / и всякий град, и страну́ христиа́нскую от вся́кия напа́сти и обстоя́ния, / да излиёт на ны пото́цы ми́лости Своея́ / и сподо́бит Небе́снаго Ца́рствия Своего́, / иде́же с вами и со всем со́нмом святы́х Земли́ Росси́йския / воспоём Бо́гови хвале́бную песнь: // Аллилу́иа.

Сей конда́к чтётся три́жды, затём 1-й и́кос и 1-й конда́к.

И́кос 1

Приидите, лю́дие, воспоём собо́р ангелопо́добных, / воспри́явших ве́ры щит, / отринувших страсте́й тьму, / я́же бы́ша крѣпции в невидимых бранѣх, / скита́ющихся в пусты́нях лопарских, / и в гора́х, и в пропа́stech земных, / обративших в бѣгство полки бесо́в, / да́же до кро́ви пострада́вших / и му́ки много́различныя от безбо́жных претерпе́вших. / Мы же, ве́рою серде́чною от ду́ши подвиза́еми / и благоговéния ду́хом исполня́еми, / помина́ем сла́вныя по́двиги ва́ша / и гла́сы хвале́бными зове́м такова́я:

Ра́дуйтесь, на зов Госпо́день ра́достно прите́кшии;

Ра́дуйтесь, всем жела́нием Христу́ последова́вшии.

Ра́дуйтесь, Святы́м Ду́хом разум соверше́нный стяжа́вшии;

Ра́дуйтесь, идо́льскую лeсть от земли́ полу́нощней изгна́вшии.

Ра́дуйтесь, обите́лей и церкве́й зиждите́лие неусыпа́емии;

Ра́дуйтесь, благове́стницы Христо́вы, на Небе́сах прославля́емии.

Ра́дуйтесь, откровéниями незрече́нными просвещéннии;

Ра́дуйтесь, си́лою апо́столов земли́ се́верныя ода́реннии.

Ра́дуйтесь, вси святии́ земли́ Ко́льския, // Це́ркве Христо́вы похвало́ и украше́ние.

Конда́к 1

Днесь ра́дуйся, ду́ше, и ликуйте, собо́ри празднолю́бнии, / я́ко до Се́вера Кра́йняго и мо́ря Ледова́таго приидо́ша ча́да Госпо́дня. / Днесь в полу́нощней идо́льстей тьме возсия́ благода́ть ве́ры, / мгла разгна́ся, облиста́ свет, / туман разсе́ся и взы́де Со́лнце Пра́вды. / Днесь Це́рковь земли́ Ко́льския прино́сит Бо́гу плоды́: / се аз и де́ти, я́же ми даде́ Бо́г; / от всяких нас бед и напа́стей свобо́ждайте, святии́, благоприятными ва́шими моли́твами, / да со умилéнием зыва́ем си́це: /

Ра́дуйтесь, вси святии́ земли́ Ко́льския, // Це́ркве Христо́вы похвало́ и украше́ние.

ЖИТИЯ

Собору Кольских святых

О, божественный полче, Небеснии воины Христа Бога, преподобнии и богоноснии отцы Земли Кольския! Вы, слово евангельское сердцы благими восприимше, молитвами, и слезами, и многими злострадания усердно Христови сораспялися есте и первее ралом Евангельских учений души своя плодоносны явили есте, послежде и неплодную пустыню лопарскую, яко благоцветущий рай, соделали есте, на трапезу духовную всех созывающе.

О, светозарнии отцы Земли Кольския, Церкви Христовы светильницы! Вы жертвы благоприятныя Богу явилися есте, преобразившися умным деланием, узрели есте будущей жизни славу. Божественным огнем души своя возжегосте, Нетварнаго Света причастилися есте, и облистали есте Земли Полнощныя Светом Невечерним, и в Сион Горний востекли есте.

Преподобнии отцы Кольстии, иноцы и миряне, мученицы и новомученицы Церкви Русския, вы, плоды скорбей и добродетелей на земли принешие, в Небесных чертозах ныне благоухаете, яко райстии цветы, и лицем к лицу зрите Пресвятую Троицу, Юже дерзновенно молитесь спастися душам нашим.

И ныне, в день всесвятых памяти вашей, молим вас прилежно, святии угодницы Христовы, наши теплии предстателие пред Престолом Божиим и ходатаи усерднии, да испросите нам, грешным и недостойным рабам, великия и богатые милости Господни, да приидем вси в познание истины, приносяще плоды достойныя покаяния, имиже обрящем благодать Всесвятаго Духа.

О, добрии наставницы наши и молитвенницы ко Господу! Исходатайствуйте нам, на земли сущим, душ спасение, земных плодов изобилие, времена мирна, дни благи, Краю Кольскому процветение.

Да и мы, недостойнии, направляеми вашими молитвами, поне на конец нашего многомятежнаго жития, возлюбим вечное паче временнаго, и в свой едионадесятый час поработаем с усердием Небесному Домовладыце Христу, и с сердечным благодарением пролиемся слезами неизреченныя радости, восхваляюще великое и достопокланяемое имя Отца, и Сына, и Святаго Духа ныне, и присно, и во веки веков.

Аминь.

Величание:

Ублажа́ем вас, / вси святи́и земли́ Ко́льския, / и чтим святу́ю
па́мять ва́шу, / вы бо мо́лите за нас // Христа́ Бо́га на́шего.

АРХИТЕКТ И СЛУЖБА СОБОРУ КОЛЫСКИХ СВЯТЫХ

Корректор – Анастасия Бочарова
Прориси икон – Инна Куксенко
Дизайн и оригинал-макет – Ольга Колчина

В электронном виде издание размещено
на официальном сайте Мурманской епархии:
<http://mmeparh.cerkov.ru>
в разделе «Книги митрополита Митрофана».

Сделать заказ можно:

- по электронной почте: eparhia_murmansk@mail.ru;
- по телефонам: +7-960 028 6677,
+7(8152) 25-97-61 или +7(8152) 25-53-38;
- на почтовый адрес: 183010, Мурманск, ул. Зеленая, 11.

Издательство Мурманской епархии
Мурманская митрополия
Русской Православной Церкви (Московский Патриархат)

ББК 86.372.24-50

Подписано в печать 10.08.2023
Формат 70 x 100 1/8. Тираж 300 экз.

Отпечатано в ООО «Типография «НП-Принт»
197110, Санкт-Петербург, Чкаловский пр., 15, тел. +7 (812) 325-22-97



Мурманская епархия